

Una Figlia d'un Giardiniere bionda come
una zingara, innamorata d'un Barcaruolo.

CANZONE I.

La Biondinna del Giardinè
L'è annamorà d'un galinè,
Ch'a veul fè 'l pofardiri e 'l gros
Subit ch'a l'ha sinch sold ados.
A l'ha 'l capel bordà d'argent
Portand da là so ciò rusnent,
Pavaire manch long d'un trabuch,
Fasand 'l fier coul mamaluch.
Oh! s'i vedeisse a fè l'amor
Coul fant da piche, e dama d'fior,
A l'è un piasì, con che afession
A s'dan d'ji bodro e d'ji pession.
A s'veulo peui una gran bin,
Tut 'l di stan ant 'l giardin
Al gros calor a comediè,
Piandse poch sust pr travajè.
Venta peui di, ch'a l'è un faseul,
Veul fè 'l grassios un barcareul,
Ch'a l'ha d'manere, e tut 'l deuit
Ch'a l'ha un borich a plè i bescheuit.
S'una sol seira, o una matin
Chial peul nen fè so san trotin,
Venta senti, con che dolor
Fa d'ij sospir pr sot e dsor!
Chila dlong manda a l'andoman
Quaichun a vedlo pr sotman,
S'mai d'vote pr desgrassia ai fus
Tacà la frev, o sautà 'l flus.

Ma quand a torna, oh che gran goi !
 Tutti doi smio quasi foi,
 Anlora as fan d'ij compiment,
 Ch' a l'è un piasì tniè da ment.
 As fico d' vote ant un canton,
 E s' van contand mila rason.
 E i seu torment da soi a soi.
 Ch' ai cherpa 'l cheur a tutti doi.
 La mare peui, ch' l' ha d' cognission,
 Ai veul pa deje d' sugission,
 Pr costa gran rason, ch' a dis,
 Ch' a venta nen sgustè j' amis.
 A son comprasse un bel tabas
 Pr fè d' armor, e gran fracas,
 E ciaudronè tuta là neuit,
 Guardè che landa, e che bel deuit !
 Vnomo un pò a la conclusion :
 A l' han da bsogn d' euli d' rolon ;
 Loli veul di d' un bon tojror,
 La mare, e fia, e l' sfojor.

La deformità d' una Figlia,
 che stimandosi bella, vuol maritarsi.

CANZONE II.

A j'è un parti ch' l'è bel
 E bon d' una matota ;
 Ma l'è senza fardel,
 E senza dota ;
 A l'è mach auta un fus,
 Tuta gheubua e storta,
 Con coul mostas ch' ai lus,
 Tra giauna e smorta.